



KENYATAAN MEDIA

KEMENTERIAN PERDAGANGAN DALAM NEGERI
DAN KOS SARA HIDUP

No. 13 Persiaran Perdana, Presint 2,
62623 Putrajaya

No. Telefon : 03-8882 5562

No. Fax : 03-8882 5569

KPDN PANTAU AKTIVITI SCAM PENJUALAN MINYAK MASAK DALAM TALIAN

PUTRAJAYA, 17 JANUARI 2024 – Kementerian Perdagangan Dalam Negeri dan Kos Sara Hidup (KPDN) kebelakangan ini sering menerima aduan daripada pengguna berkaitan sindiket penipuan dalam talian (*scam*) yang menawarkan minyak masak paket. Penjualan dilakukan samada melalui laman sosial atau tapak pasar dalam talian bertujuan memperdaya mangsa untuk mendapatkan bekalan dan turut dikesan menawarkan dengan harga yang lebih murah.

KPDN telah menumpukan usaha berterusan memantau aktiviti penjualan minyak masak dalam talian dengan menubuhkan unit khas di Bahagian Penguat Kuasa bagi tugas pemantauan aktiviti tersebut. Unit ini akan menjalankan pemantauan dan menganalisis data berkaitan bagi tujuan penguatkuasaan.

Modus operandi aktiviti *scam* penjualan minyak masak adalah dengan memperdaya mangsa dengan menggunakan laman media sosial atau pasar dalam talian. Sindiket dikesan menawarkan minyak masak untuk dijual dan terdapat iklan umpanan dengan menawarkan dengan harga yang lebih murah dari pasaran memandangkan barangan tersebut mendapat permintaan yang tinggi.

Pada tahun 2024, 1 tindakan kes di bawah Akta Kawalan Bekalan 1961 hasil tindakan proaktif yang dilaksanakan telah diambil pada 9 Januari 2024 kerana berurusniaga barang kawalan tanpa lesen yang sah. Berdasarkan statistik penguatkuasaan bermula 4 Julai 2022 sehingga 31 Disember 2023, sebanyak 62 pemeriksaan fizikal telah dilakukan di seluruh negara manakala sebanyak sebelas 11 aduan yang berkaitan telah diterima dalam tempoh yang sama. Daripada jumlah itu, sebanyak tiga tindakan kes di bawah Akta Kawalan Bekalan 1961 [Akta 122] telah diambil dan disiasat ke atas pihak yang terlibat yang melakukan kesalahan

berkaitan penjualan minyak masak secara dalam talian. Antara kesalahan yang dilakukan adalah mengurusniaga barang kawalan berjadual iaitu minyak masak tanpa lesen yang sah dan menyimpan minyak masak di tempat yang tidak dilesenkan.

KPDN juga telah bekerjasama dengan pengendali tapak pasar secara dalam talian dalam negara bagi memastikan aktiviti *scammer* serta penyelewengan minyak masak yang dilakukan secara dalam talian ini dapat diatasi dengan lebih berkesan. Hasilnya, sebanyak 198 iklan berkaitan penjualan barang kawalan berjadual minyak masak secara dalam talian telah dinyahutur (*content removal*) dalam tempoh yang sama.

KPDN ingin memberikan amaran keras kepada semua pihak yang berurusan dengan barang kawalan dan bersubsidi terutamanya minyak masak agar sentiasa mematuhi perundangan yang telah dikuatkuasakan dan menegaskan bahawa Kementerian tidak akan berkompromi dengan mana-mana pihak yang didapati terlibat dalam penyelewengan barang kawalan dan bersubsidi termasuk yang dijual secara dalam talian.

Pengguna juga dinasihatkan supaya lebih berhati-hati dalam melihat tawaran iklan pembelian minyak masak paket murah yang dipaparkan kerana keadaan ini memberikan kelebihan kepada *scammer* untuk memperdaya mangsa-mangsa mereka. Tindakan pantas sekiranya masyarakat pengguna mengesan aktiviti sebegini adalah dengan menyalurkan pertanyaan dan aduan kepada KPDN.

Mana-mana orang yang melakukan kesalahan boleh diambil tindakan di bawah Akta Kawalan Bekalan 1961 [Akta 122] dan jika disabitkan boleh didenda tidak lebih RM1,000,000.00 (Ringgit Malaysia Satu Juta) manakala bagi kesalahan berikutnya tidak melebihi RM3,000,000.00 (Ringgit Malaysia Tiga Juta) bagi orang perseorangan atau penjara tidak melebihi tiga tahun atau kedua-duanya sekali manakala bagi syarikat sekiranya sabit kesalahan boleh didenda tidak melebihi RM2,000,000.00 (Ringgit Malaysia Dua Juta) manakala bagi kesalahan berikutnya tidak melebihi RM5,000,000.00 (Ringgit Malaysia Lima Juta).

Selain itu, syarikat ini juga boleh disiasat di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 (AMLATFPUAA 2001) [Akta 613] iaitu kesalahan pengubahan wang haram bagi tujuan mengesan, membeku, menyita serta sehingga ke peringkat perlucutan hak ke atas apa-apa hasil pendapatan atau harta yang dijana daripada aktiviti haram penyelewengan berkaitan minyak masak.

Jika disabitkan dengan kesalahan di bawah Akta 613 ini boleh dipenjarakan selama tempoh tidak melebihi lima belas (15) tahun dan juga boleh didenda tidak kurang daripada lima kali ganda jumlah atau nilai hasil daripada aktiviti haram atau peralatan kesalahan itu pada masa kesalahan itu dilakukan atau lima juta ringgit yang mana yang lebih tinggi.

KPDN meminta kerjasama orang ramai untuk memaklumkan sebarang aduan melalui saluran berikut:

- i. Whatsapp ke 019- 279 8000;
- ii. Portal e-Aduan <http://eaduan.kpdn.gov.my>
- iii. Call Centre 1-800-886-800, dan;
- iv. Aplikasi Telefon Pintar Ez ADU KPDN.

YBHG. DATUK AZMAN BIN ADAM,
KETUA PENGARAH PENGUAT KUASA,
KEMENTERIAN PERDAGANGAN DALAM NEGERI
DAN KOS SARA HIDUP.

PUTRAJAYA, 17 JANUARI 2024.

###